

清史館循良傳

陳文黻湖南長沙人附監生捐輸軍餉獎通判同治間投効陝甘軍營克復西甯晉同知尋指分陝西光緒二年充善後局委員四年大軍克復烏魯木齊叙關中饋餉功擢知府六年筦白河釐務裁串兒錢銀錢折易必平其值商人費省十二三而權收轉增倍七年署鄆縣知縣旋補留壩廳同知文黻之治鄆也朔望必宣講 聖諭廣訓反覆譬喻以暢其旨聞者多感泣凡告期坐堂皇受牒訴立予判決舊任積案兩月悉結公事不由閹人關白亦未經遣鈎攝之隸九年涖留壩廳本任治行亦如

在鄆時十年伊犁收還以文黻舊日籌餉加四品銜留壩向有棗茨經費用以葺獄解囚歲征之民兩倍正賦文黻下車首革之境內無質肆貧民緩急稱貸盤剝者要重息或子母相埒文黻捐廉爲倡設裕民公所貸錢者以衣服質贖以期息以十一紳綜其事而官歲會之取其贏以抵棗茨費並留地方公用民困大蘇廳治山多於田又無他物產可資生養文黻憂之先是攝鄆縣時常課民種桑數十萬株會去任而利未溥及至是乃周歷山谷辨其土宜作種楡說及山蠶四要徧諭鄉民因頒給樹秧蠶種募蠶師樹工導之絲成則製機教之織復慮民不樂

趨設收買絲綢局重其值以招引又購給紫陽茶種課之藝茶
於是地無棄利民無遺力留壩俗素陋樸嚮學者鮮歲科兩試
附鳳縣額每試或不得一人文黻爲建紫柏書院置書籍立課
程兼設義塾拔書院高才者爲之師閱數年橫舍彬彬稱盛遂
請奏設廳學建官置額初文黻見廳治有谿河歲久壅闕往往
橫溢爲患因陳開河數十事大府聽之而不果發及猝被水時
已逾報災限立以便宜開倉賑之督同紳士赴鄉查放跋涉沮
洳侵尋成疾不少已並令妻子雜作糜粥賑近郊全活無算明
年春隣境流民至集公款不足則罄廉貸資繼之復謀以工代

賑迺申開河議不得請則因其衆除道路濬溝渠出私囊給值
負累至數千緡而民大稱便聽介萬山中林谷深阻奸民狙伏
刦行李或掠婦孺販賣境外文黻密圖其處示捕役時復微服
親迹之卒皆就擒寘之法其治保甲也於民戶職業田產丁口
年歲及已未婚嫁所聘字姓氏悉書於冊或譏其煩碎及振撫
事起稽之冊乃如家至戶覲且從前戶婚田土之案日有所聞
至著籍在官咸莫敢欺訟益簡民有殺媳匿其屍者母家以無
左驗不得直文黻偶行經山徑羣雅噪於前索而得之一訊具
服十八年二月初次邊俸期滿部議入卽升班升用旋調署潼

關廳未赴任閏六月卒二十年陝西巡撫鹿傳霖臚陳文黻歷
官政績奏請旨付史館列傳允之